『聖德太子傳曆』上 崇峻元年条

元年〈戊申〉春三月。百濟國使幷僧惠聰〈傍摠ィ〉令欣。惠寔等來獻佛舍利。又恩率。首信等來進調。別獻佛舍利幷僧聆照。律師**令威**。惠衆。惠宿。道嚴。令開等。寺工一人。鑪盤師一人。造瓦師二人。畫工一人。奏曰。本王傳奏。承陛下紹其踐祚。肇興佛道。漢帝東流之夢。法王西來之猷。於今驗矣。傳燈聖皇。復誕附神之下。立幢眞人。重出馬臺之前。臣等不勝至喜。貢渡三藏大師。律學比丘。伏請。陛下照佛日於若木之鄉。掩慈雲於扶桑之邑〈云云。〉太子大悅。問衆師以大義。衆師妙會潤以微言。天皇密詔太子曰。人言。汝有神通之意。復能相人。汝相朕之躰。勿有形迹。太子奏曰。陛下玉體。實有仁君之相然恐非命忽至。伏請。能守左右勿容姧客。天皇問之。何以知之。太子曰。赤文貫眸子。爲傷害之相。天皇引鏡而窺之大驚之。太子謂左右曰。陛下之相不可相博。是過去之因也。若崇三寶。遊魂般若者。萬分之一。庶幾免矣。卽命群臣左右。能奉衞護陛下。近習之間。宿寤相易。